



HARI MENABUNG KEBANGSAAN



Petikan Titah

Kebawah Duli Yang Maha Mulia Paduka Seri Baginda
Sultan Haji Hassanal Bolkiah Mu'izzaddin Waddaulah
Ibni Al-Marhum Sultan Haji Omar 'Ali Saifuddien Sa'adul Khairi Waddien
Sultan Dan Yang Di-Pertuan Negara Brunei Darussalam
sempena Tahun Baru Masihi 2012

"Disamping itu, jangan pula lupa, turut menjadi kunci kestabilan dan kemakmuran ialah amalan berjimat cermat. Sikap berhemat dalam berbelanja, sama ada di peringkat kerajaan, rumah tangga mahupun individu adalah tonggak *survival* ekonomi negara. Kerana itu, berbelanja besar di luar kemampuan adalah satu tragedi pahit."

Duli Yang Teramat Mulia Paduka Seri Pengiran Muda Mahkota Pengiran Muda Haji Al-Muhtadee Billah ibni Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Menteri Kanan di Jabatan Perdana Menteri selaku Pengerusi Lembaga Pengarah Autoriti Monetari Brunei Darussalam (AMBD) semasa Majlis Pembukaan Rasmi Hari AMBD pada 28hb Mei 2015 telah mengisytiharkan tarikh 28hb Mei sebagai Hari Menabung Kebangsaan. Pada tahun ini, tema yang dipilih bersemepena Hari Menabung Kebangsaan adalah "Generasi Celik Kewangan", yang mana mencerminkan matlamat untuk membangunkan generasi yang berkemahiran dan boleh berdikari dari segi kewangan.

Budaya menabung adalah satu amalan yang terpuji yang perlu ditanamkan ke dalam diri setiap individu sebaiknya daripada peringkat awal lagi. Sepertimana jua peribahasa "Sediakan Payung

Sebelum Hujan”, wang simpanan ini boleh digunakan sebagai dana kewangan jika diperlukan, apatah lagi semasa kecemasan dan pada situasi-situasi yang tidak dijangkakan.

Makna disebalik logo “Hari Menabung Kebangsaan”

1. Warna

Tiga warna yang digunakan di dalam logo ini mencerminkan kepentingan konsep pengurusan kewangan untuk diterapkan kepada individu dengan berlatarbelakangkan sektor kewangan yang kukuh dan stabil.

- Hijau sering dikaitkan dengan wang dan kekayaan. Warna ini juga melambangkan masa depan yang cerah sebagai hasil daripada amalan menabung.
- Biru gelap adalah simbol kebijaksanaan dan kepintaran. Ianya juga melambangkan perbelanjaan yang bijak dan berhemah, mengambil kira juga konsep “keperluan atau kehendak”.
- Kelabu mencerminkan kestabilan dan kekuahan industri kewangan yang mana memudahkan aktiviti-aktiviti kewangan bagi mencapai matlamat kewangan.

2. Duit syiling

Imej duit syiling yang tersusun tinggi mencerminkan industri kewangan di Negara Brunei Darussalam. Kuantitinya pula melambangkan 10 denominasi matawang Brunei yang dikeluarkan oleh AMBD iaitu BND 1, BND 5, BND 10, BND 20, BND 25, BND 50, BND 100, BND 500, BND 1,000 dan BND 10,000.

3. Daun Simpur

Daun Simpur melambangkan bunga kebangsaan Negara Brunei Darussalam dan mencerminkan budaya Negara Brunei Darussalam. Budaya menabung juga adalah satu budaya yang perlu diterapkan kepada kesemua rakyat dan penduduk di Negara Brunei Darussalam. Jumlah Daun Simpur dalam logo tersebut membawa erti tersendiri, di mana ia menunjukkan empat kegunaan utama wang seperti berikut:

- (a) Untuk melindungi diri dan orang tersayang;
- (b) Untuk melipatgandakan harta bagi tujuan masa depan;
- (c) Untuk memenuhi keperluan; dan
- (d) Untuk meningkatkan amalan melalui zakat dan sedekah.

Tip-tip bagi memanfaatkan pengunaan wang:

(a) Untuk melindungi diri dan orang tersayang

Pastikan awda mempunyai tabungan khas khusus bagi kegunaan semasa kecemasan. Awda perlu menyimpan, walaupun sedikit, tetapi lakukannya secara istiqamah dan berterusan. Pastikan awda menyimpan sekurang-kurangnya sepuluh peratus daripada gaji bulanan awda. Bagi

memastikan penyimpanan secara berdisiplin, arahkan bank awda untuk membuat potongan secara automatik untuk disalurkan ke akaun simpanan yang berbeza.

(b) Untuk melipatgandakan harta bagi tujuan masa depan

Seperti kata pepatah “sedikit-sedikit, lama-lama jadi bukit”, simpanan awda boleh dilipatgandakan jika awda mengamalkan sifat menabung secara sabar dan berdisiplin. Ketahuilah jenis produk-produk simpanan yang ditawarkan di pasaran, dan pilihlah mengikut keperluan awda. Terdapat juga produk pelaburan yang berkonsepkan simpanan yang boleh awda terokai.

Sebelum membuat sebarang pelaburan, kenali dengan jelas jenis-jenis pelaburan yang ditawarkan. Ketahui matlamat sebenar pelaburan yang bakal awda lakukan. Padankan matlamat pelaburan dengan profil pelaburan awda. Pada dasarnya, pelaburan yang menjanjikan pulangan lumayan, juga mempunyai risiko yang amat tinggi. Pastikan awda telah faham secukupnya mengenai selok-belok pelaburan dan membuat kajian terperinci. Jangan sesekali melabur berlandaskan naluri tanpa merujuk kepada maklumat yang sahih. Elakkan juga menyertai pelaburan yang menjanjikan pulangan yang tidak munasabah dalam jangkamasa yang singkat kerana awda mungkin terpedaya dengan perangkap Skim Cepat Kaya.

Jika awda ingin membuat pelaburan tetapi tidak mempunyai pengetahuan kewangan yang mencukupi, awda boleh mempertimbangkan untuk mendapatkan khidmat Perancang Kewangan yang berlesen atau menerokai produk-produk pelaburan yang ditawarkan oleh institusi-institusi kewangan yang berlesen.

(c) Untuk memenuhi keperluan

Wang adalah salah satu *medium* pertukaran yang digunakan di dalam transaksi jual beli. Jika ingin memiliki barang yang mempunyai nilai melebihi had kemampuan awda, buatlah perancangan kewangan dengan bijak bagi memenuhi keperluan tersebut. Sebaik-baiknya, elakkanlah bergantung kepada tabiat berhutang. Jika ianya tidak terkawal, ini akan membebankan awda di kemudian hari.

Marilah amalkan sikap merancang kewangan awda dari sekarang. Ini dapat dilaksanakan melalui pelan perancangan kewangan khas yang meliputi matlamat keperluan serta pelan perbelanjaan bagi setiap bulan mendatang. Amalkan juga sikap menyenaraikan barang yang hendak dibeli sebelum melangkah pergi ke pusat membeli belah bagi mengelakkan daripada berbelanja untuk barang yang tidak penting.

(d) Untuk meningkatkan amalan melalui zakat dan sedekah

Sedekah dan zakat merupakan amalan yang soleh yang dapat dijadikan sebagai saham untuk di akhirat kelak. Sayugia diingatkan wang simpanan yang cukup syaratnya wajib dizakatkan. Diantara tujuan zakat adalah untuk membantu umat Islam yang miskin, dapat melahirkan rasa kasih sayang sesama Islam, sumber kestabilan dan kemakmuran ummah, tanda kesyukuran kepada nikmat Allah Subhanahu Wata'ala, membersihkan hati dari sifat bakhil, dan menyucikan harta yang mungkin syubhah serta menyuburkan harta.

Jika wang simpanan awda belum cukup syarat untuk dizakatkan, amalan sedekah juga amat digalakkan. Antaralain manfaat bersedekah ialah untuk mendapatkan keampunan Allah Subhanahu Wata'ala, memurahkan rezeki, menyembuhkan penyakit, menolak bala dan memanjangkan umur.

Berminat untuk mengetahui dengan lebih lanjut bagaimana awda boleh menguruskan kewangan awda dengan lebih cekap? Datanglah ke Pameran Perancangan Kewangan yang akan diadakan di Lobi Kementerian Kewangan, Commonwealth Drive pada hari Sabtu Mei 28, 2016 dari jam 10:00 pagi hingga 4:00 petang dan awda boleh berjumpa dengan perancang kewangan yang berkelayakan!

Ambillah langkah pertama awda ke arah masa depan kewangan yang lebih cerah!